

Iniziativa per supplements d'uffants senza taglia

■ (anr) La nova ediziun dal magazin, ni da la gasetta-chasa da la Partida cristiandemocratica svizra, «La politica», che cumpara quatter giadas ad onn, stat prest dal tut en l'ensaina da la votaziun da dumengia proxima davart sia iniziativa. Quella vul ch'ils supplements per uffants vegnian libers da la taglia. Questa iniziativa ha la pcd svizra inoltrà 2012 cun 118 425 sottascripziuns e la finamira per propi è da rinforzar la famiglia.

Cun ina retscha dad artitgels e cirtond tranteren anc bleras vuschs da singuls – e quai en tuts quatter linguatgs naziunals – vegnan ils evidents avantatgs per dar sustegn a la famiglia cun votar gea per l'iniziativa suttastritgads. En la contribuziun rumantscha numna cuss. naz. *Martin Candinas* questa iniziativa «Ina schanza unica a favur dallas famiglias».

Cuss. naz. *Marco Romano*, dal Tesin, constatescha en sia columna «Senza il talian na datti nagina Svizra. Ina Svizra che banduna il plurilinguisssem è

ina Svizra che perda ina valur fundamentala da sia atgna identitad». En ina lunga intervista cun cuss. fed. *Doris Leuthard* fa l'auta magistrada pliras interessantas constataziuns. Ella di ch'i giaja uschè bain cun la Svizra sco prest anc mai. E tuttina dettia i critica. En il center da la lavur da ses departament stettia la politica dal clima e da l'energia. 2015 vegnian las partidas a stuaire sa fatschentar cun la politica da l'Europa. La mobilitad vegnia a crescer vivanant en noss pajais, era quella durant il temp liber.

Decisivs per cuss. fed. *Doris Leuthard* restan valitas e la cultura politica. Talas muntian da laschar tiers er auters mainis. Impurtantas sajan dentant era solidaritad e l'atgna responsabladad. Quai è e fa ora la pcd per cuss. fed. *Doris Leuthard*. La dignitad da l'uman, che s'exprima tar la pcd er en il «c», è da resguardar ed era da realisar en la politica. Gist perquai saja ella sa decidida a ses temp cunscientamain per la pcd.